

Արարատ Ստեփանյան

ՓԻԼԱՐՏՈՍ ՎԱՐԱԺՆՈՒՆՈՒ ԻՇԽԱՆԱԴԵՏՈՒԹՅՈՒՆԸ (1072-1090 թթ.)

Բանալի բառեր - Սելջուկներ, Փիլարտոս, Մանազկերտ, Մարաշ, պետություն, Սեբաստոս, զորք, Կիլիկիա, Թռռնիկ, կաթողիկոսություն:

Փիլարտոս Վարաժնունու հանդես գալու ժամանակը

11-րդ դարի երկրորդ կեսին Բյուզանդական կայսրությունը ներքին ու արտաքին քաղաքականության մեջ լուրջ դժվարությունների հանդիպեց. դա մասնավորապես կապված էր սելջուկ-թուրքերի արշավանքների հետ, որոնք արևելքից արշավելով՝ երկիրը ծանր կացության մեջ էին դրել: Կայսրության դրությունն ավելի վատթարացավ 1071 թ. Մանազկերտի ճակատամարտից հետո: Բյուզանդական բանակի՝ Մանազկերտում կրած ծանր պարտությունից հետո կայսրությունում անիշխանություն հաստատվեց: Զաղաքական անկաստ հանգամանքերից օգտվեցին կայսրության զինվորական ծառայության մեջ գտնվող մի շարք գործիչներ, այդ թվում՝ Փիլարտոս Վարաժնունին:

1. Փիլարտոս Վարաժնունու ծագումը

Փիլարտոս Վարաժնունու կենսագրությունը մինչև 1071 թ. քիչ է հայտնի¹: Նրա մասին առաջին հավաստի տեղեկությունները վերաբերում են սելջուկների դեմ Ռոմանոս Դ Դիոգենես (1067-1071) կայսեր կողմից իրականացրած երկրորդ արշավանքին (1069 թ.): Ինչպես գրում է Զովհաննես Սկիլիցեսը, կայսրը զորքով հասնում է Ռոմանոպոլիս (Ռոմանոպոլիսը բերդաքաղաք էր և գտնվում էր Մեծ Հայքի Ծովք (Չորրորդ Հայք) աշխարհի Բալահովիտ գավառում², իսկ ըստ Ե. Զոնիգմանի՝ Ռոմանոպոլիսը Ճապաղուրն է)³ և այնտեղից իսլաթ գնալու նպատակով զորքը բաժանում է երկու մասի՝ մեծ մասը թողնելով Ֆիլարետոսի զորավարի հրամանատարության ներքո, իսկ կայսրը զորքով շարժվում է առաջ, հասնում է Եկեղյաց գավառ⁴:

Ֆիլարետոսը նույն Փիլարտոսն է, որ պատմության մեջ հայտնի է Վարաժնունի տոհմանունով: Նա սկզբում սելջուկների դեմ հաջող մարտեր մղելով՝ ի վերջո պարտություն է կրում, իսկ նրա մոտ մնացած զինվորները փախչում են կայսեր մոտ⁵:

¹ Տե՛ս В. Степаненко, Античная древность и средние века, Государство Филарета Варажнуни (1071-1084/86 гг.), Свердловск, 1975, с.86:

² Տե՛ս Հայաստանի և հարակից շրջանների տեղանունների բառարան, Երևան, 1998, էջ 448:

³ Տե՛ս Օտար աղբյուրները Հայաստանի և հայերի մասին, 10. Բյուզանդական աղբյուրներ, Գ. Զովհաննես Սկիլիցես, թարգմանությունը քննարկից, առաջաբան և ծանոթագրություններ Հրաչ Բարթիկյանի, Երևան, 1979, էջ 375, ծնթ. 701:

⁴ Նույն տեղում, էջ 230, 375, ծնթ., 705:

⁵ Նույն տեղում, էջ 230:

Փիլարտոսը երիտասարդությունը անցկացրել էր հորեղբոր՝ Կոզեմնի մոտ՝ Ջարսն-Ստուր գավառի Չորվրի-Կոզեմն վանքում: Քաղկեդոնական դառնալու պատճառով Մատթեոս Ուռհայեցին գրում է, թե «Սա ելեալ յանապատէ եւ եղել պիղծ անապատի»¹:

Պատմագիտության մեջ Փիլարտոս Վարաժնունու անձի շուրջ կա բանավեճ: Սմբատ Սպարապետը իր «Տարեգրքում» Փիլարտոսին բնութագրում է որպես անհավատ ու բռնակալ մեկը, ով վանքից դուրս գալով, զինվորական դառնալով՝ տիրեց բազում գավառների ու բերդերի. «Բռնակալեալ երեւեցաւ անօրէն իշխանն Ֆիլառտոսն, եւ սկսաւ պատերազմել ընդ հաւատացեալսն Զրիստոսի. քանզի ոչ էր հաստատեալ ի հաւատս ճշմարիտս, զի ոչ հայ էր եւ ոչ Յոյն, բայց ազգաւ ի հայոց էր ի գաւառէն Ջարսընմարոյ, սնեալ ի վանս եւ լեալ կոպիտ արեղայ, եւ ելեալ յանապատէ տիրեաց բազում բերդից եւ գաւառաց...»²: Մ. Չամչանցը գրում է, որ Փիլարտոսը հունադավան էր և Վարաժնունիք գավառից. «Փիլարտոս ոմն անուն՝ հայ ազգաւ եւ կրօնիւք յոյն՝ ի գաւառէն Վարաժնունեաց, կարգեալ զօրավար յունաց յաւուրս Դիոժենայ կայսեր»³: Հետևելով Մ. Չամչանցին՝ Գ Միքայելյանը նույնպես գտնում է, որ Փիլարտոս Վարաժնունին Վասպուրականի Վարաժնունիք գավառում է ծնվել⁴, թէև Կոմմագենացի հեղինակը կարծում է, որ Փիլարտոսի իրական անունն ու ծննդավայրն անհայտ են⁵: Ըստ Ն. Ադոնցի տեսակետի՝ Փիլարտոսը նույն Վարուժան Վարաժնունին է, որ պատկանել է հայկական ծագում ունեցող հայտնի բյուզանդական Վահամիսների կամ Վահրամիսների (Վահրամյաններ) տոհմին, որի նեկայացուցիչներից է Սախակիոս Վրախամիոսը (Սահակ Վահրամյան): Նա կայսերական բանակը լքած զորավար էր, որ անցել էր կայսերական բանակի դեմ ապստամբած Վարդաս Սկլերոսի կողմը՝ շրջափակումից ազատելով նրան ու նրա զորքը հասցնելով Լապարայի դաշտավայր, որտեղ և Վարդասին հաջողվում է տանել առաջին հաղթանակը⁶: Վարդաս Սկլերոսի ապստամբությունը տեղի է ունեցել 976 թ., հետևաբար Փիլարտոսի տոհմի բեմելը Բյուզանդիայում տեղի է ունեցել Հովհաննես Չմշկիկի օրոք (969-976)⁷: Ն.Ադոնցը նաև ստուգաբանում է Վախրամիոս անունը՝ գտնելով, որ դա հայկական Վահրամ, ժողովրդական Վախրամ անվան հին ձևն է, և Վախրամիոս ու Սախակիոս անունները բացահայտում են Մշո և Վանի բարբառներին հատուկ արտասանությունը, որտեղ «հ» հնչյունը արտասանվում է «խ» Վախրամ՝ Վահրամի փոխարեն և Սախակ՝ Սահակի փոխարեն⁸: Երվանդ Զատունին Անտիոքի իշխան Պեխտի անվան բացատրությանն անդրադառնալիս գրում է, որ մեր միջնադարյան հեղինակները իսպառուրին Պեխտ են անվանել նրա հունադավան լինելու համար, այնպես, ինչպես Վարուժանին՝ Փիլարտոս⁹: Մենք համամիտ ենք Ն. Ադոնցի տեսակետին, որը

¹ Մատթեոս Ուռհայեցի, Ժամանակագրություն, Վաղարշապատ, 1898, էջ 206:

² Սմբատայ Սպարապետի Տարեգրք, Վենետիկ, 1956, էջ 78-79:

³ Միքայել Չամչանց, Հայոց պատմություն, հ. Բ, Երևան, 1984, էջ 997:

⁴ Տե՛ս Գ. Միքայելյան, Կիլիկիայի հայկական պետության պատմություն, Երևան, 2007, էջ 71:

⁵ Տե՛ս «Փիլարտոս հայը. կիլիկեայ ճոխութեան բուն հիմնադիրը», գրեց Կոմմագենացին, Հայեալ, 1930, էջ 10:

⁶ Տե՛ս Ն. Ադոնց, Երկեր, հ. Ե, Երևան, 2012, էջ 496:

⁷ Նույն տեղում, էջ 498:

⁸ Նույն տեղում, էջ 499:

⁹ Տե՛ս Երվանդ Զատունի, ԺԱ դարու Անտիոքի հայ կառավարիչներ Պեխտ-Խաչատուր և Վասակ Պահլավունի, «Հայկազեան հայագիտական հանդես», Պեյրուբ, 1971, էջ 127:

փաստերի հիման վրա ապացուցում է Փիլարտոսի՝ Բյուզանդիայում հայտնի Վահրամիսների տոհմից լինելը:

Բացի պատմական աղբյուրներից, Փիլարտոսի մասին արժեքավոր նյութ են պարունակում նրա անունով պահված կնիքները: Սանկտ Պետերբուրգի պետական Երմիտաժում պահվող Փիլարտոսի արճճե կնիքներից մեկը փաստում է նրա՝ մագիստրոսի և դուքսի կոչման արժանանալու մասին¹: Կնիքի առաջնամասում պատկերված են սրբապատկով երկու զիվոր. աջ կողմում Թեոդորոսն է, ձախում՝ Դմիտրին՝ զինվորական բաղադրիչները ձեռքին: Հակառակ կողմում վեցտողանի հունարեն գրությունն է. «Աստված, օգնիր Փիլարտոս Վարաժնունուն՝ մագիստրոսին և դուքսին»²:



Բելգիայի Թագավորական գրադարանի մեդալների կաբինետում է գտնվում կնիքներից մյուսը, որի առաջնամասում պատկերված է Թեոդորոսը աջ ձեռքը հենած նիզակին, ձախ ձեռքով վահանը բռնած, հակառակ կողմում կա նույնպես հունարեն գրություն, որտեղ ասվում է «Աստված, օգնիր Փիլարտոս Վահրամիսին, Անտիոքի կուրապաղատին և դուքսին»³: Փիլարտոսը կուրապաղատի կոչման և դուքսի պաշտոնին արժանացել է Նիկեիոր 3-րդ Վոտանիատեսի (1078-1081) կառավարման ժամանակ⁴:



¹ Ст'я В. Шандровская, Эрмитажные печати Филарета Врахамия (Варажнуни), «Լրաբեր», ՀԽՍՀ ԳԱ (հասարակ. գիտ.), 1975, №3, էջ 39:

² Նույն տեղում, էջ 40:

³ Նույն տեղում, էջ 41:

⁴ Նույն տեղում, էջ 41:

Կնիքներից մեկն էլ գտնվում է Վատիկանում, որի առաջնամասում նորից պատկերված է Թեոդորոսը, իսկ հակառակ կողմի վեցտողանի գրությունում Փիլարտոսը նշվում է որպես Բյուզանդիայի արևելյան գործերի՝ սխոլերի¹ դոմեստիկոս (գորավար) և պրոտոկուրապաղատ: Նույն կնիքի մեկ այլ օրինակ պահվում է Էրմիտաժում²:



Այս կնիքների գոյության փաստը ևս ապացուցում է Փիլարտոսի հզոր իշխանության ու բարձր դիրքի մասին:

Ամփոփելով, կարող ենք ասել, որ Փիլարտոսը եղել է Վարաժնունի տոհմից և աղբյուրներում հիշված է Վախրամիոս տոհմանունով:

2. Փիլարտոս Վարաժնունու իշխանապետության հիմնման նախադրյալները

Փիլարտոս Վարաժնունու ռազամաքաղաքական գործունեության նշանակալի ու հաջող ժամանակաշրջանը սկսվում է Մանազկերտի ճակատամարտից հետո: Դիոգենեսի մահվան պատճառով սկսված քաղաքացիական պատերազմները նպաստեցին Փիլարտոսի իշխանության հիմնման համար: Նա գրավում է Մարաշը (Գերմանիկ) և դարձնում իր իշխանապետության կենտրոն³: Նրան հաջողվում է նաև ժամանակավորապես հետ մղել սելջուկների առաջխաղացումը: Բյուզանդիան ստիպված ճանաչում է Փիլարտոսի նվաճումները⁴: Ինչպես վկայում է Մատթեոս Ուռնայեցին, Փիլարտոսին հաջողվեց դառնալ անկախ տիրակալ և կազմել 20 հազար զինվորից բաղկացած զորք: Դա պարզվում է Փիլարտոսի պատգամաբերների՝ Սասունի իշխան Թոռնիկին ուղղված պահանջից, որը մեջ է բերում Մատթեոս Ուռնայեցին. «Եւ ասեն ցԹոռնիկ կոչնականքն Փիլառտոսին թե՛ «Ահա գայ բազում զորօք ի վերայ քո եւ տապալեալ աւերեսցե զգաւառսն քո»: Ասե Թոռնիկ. «Եւ քանի՞ են զօրքն Փիլառտոսին»: Ասեն արքն՝ «Իբրեւ քսան հազար»⁵: Մ. Չամչյանցը Փիլարտոսի զորքի թվաքանակի մասին գրում է. «...զայսու ժամանակաւ ինքնազլուիս ձեռներեցութամբ յապստամբու-

¹ Ст'я А. Мохов, Доместики схол запада второй половины X начала XII в. По данным сфрагистики, Античная древность и средние века. Екатеринбург, 2008 вып. 38. էջ 165:

² Ст'я В. Шандровская, նշվ., աշխ, էջ 41- 42:

³ Ст'я Ս. Բոռնազյան, Յայաստանը և Սելջուկները 11-12-րդ դդ, Երևան, 1980, էջ 187:

⁴ Նույն տեղում, էջ 187:

⁵ Ст'я Մատթեոս Ուռնայեցի, նշվ աշխ., էջ 207:

թիւն զինեալ՝ ժողովեաց առ ինքն՝ ի հայոց եւ յայլոց ազգաց արս իբրեւ քսան հազար. եւ տիրեաց բազում քաղաքաց յերկրին յունաց եւ հայոց, եւս եւ այլ ազգեաց. եւ եկեալ բնակեցաւ՝ ի Մշար կամ՝ ի Մարաշ»¹: Իշխանության սահմանների ընդարձակման և իշխանության ամրապնդման համար Փիլարտոսը սկսում է նոր ծրագրեր մշակել:

11-րդ դարի կեսերին Տարոնը և Սասունը մտնում էին Գրիգոր Պահլավունի Մագիստրոսի իշխանությանը հանձնված Բյուզանդիայի արևելյան շրջանների մեջ՝ անմիջականորեն գտնվելով Գրիգոր Մագիստրոսի որդու՝ Գրիգոր Վկայասերի փեսա Թոռնիկ Մամիկոնյանի իշխանության ներքո²: Ըստ Է. Դանիելյանի՝ Սասունի Թոռնիկ իշխանը սերում է Մամիկոնյան կամ Մամիկոնյան-Թոռնիկյան տոհմից³:

Փաստորեն սեփական իշխանությունը հզորացնելու և ընդարձակելու համար Փիլարտոսը փորձում է իր գերիշխանությունը հաստատել ռազմական զգալի ուժի տիրապետող Սասունի իշխան Թոռնիկի վրա: 1073 թ. Փիլարտոսը պատվիրակություն է ուղարկում Թոռնիկ իշխանի մոտ և առաջարկում հպատակվել իրեն: Թոռնիկ իշխանը լսելով այդ՝ «ծիծաղեալ զանմիտ հրամանս նորա և ասացեալ թէ. «Ահա որ բնաւ ես ոչ տեսանեմ զերեսս նորա»⁴: Փիլարտոսը դիմում է կաթողիկոս Գրիգոր Մագիստրոսի միջնորդությանը՝ կարծելով, թէ Թոռնիկը չի կարողանա մերժել հայոց հայրապետին: Սակայն վերջինիս այցը ապարդյուն անցավ, Թոռնիկը մերժում է նաև կաթողիկոսի՝ Փիլարտոսին հպատակվելու առաջարկը: Փիլարտոսը զորքով գրոհում է Սասունի վրա, ինչը թեև անակնկալի է բերում Թոռնիկին, սակայն նրան հաջողվում է 5000 հետևակ և 6000 հեծելազոր դուրս բերել հանկարծակի հայտնված Փիլարտոսի դեմ⁵: Թոռնիկ իշխանը զորքով գալիս է Ճապաղջուր՝ Փիլարտոսի դեմ⁶: Սակայն Փիլարտոսի զորքը այլևս անյտեղ չէր, ուստի Թոռնիկը հետևակ զորքը ետ է ուղարկում Սասուն, իսկ ինքը հեծելազորով մեկնում է Արշամաշատ (այն պատկանում էր Թոռնիկին և կառուցված էր Արածանի գետի վրա), իսկ այնտեղից՝ Անձիտ: Անձիտ գավառի Ալեյուա դաշտում հանդիպում են երկու հակառակորդների զորքերը: Թոռնիկին հաջողվում է պարտության մատնել Փիլարտոսի զորքին և վերջինս միայն մի կերպ է կարողանում ազատվել հետապնդումից: Փիլարտոսին օգնության շտապող նրա դաշնակից Ամիր-Քափրը (Մայաֆարդիևի Մրվանյան ամիրան), չհասնելով Փիլարտոսին, որոշում է դավադրությամբ սպանել Թոռնիկին: Նա ինչույթի է հրավիրում Թոռնիկին՝ սպանելու մտադրությամբ: Թոռնիկին հաջողվում է ազատվել ծուղակից. ծանր վիրավորելով ամիրային՝ նա փախչում է Արշամաշատ: Սակայն Ամիր-Քափրի դարանակալած զինվորներից մեկը զխատում է Թոռնիկին և նրա գլուխը ուղարկում Փիլարտոսին: Վերջինս էլ, ինչպես նշում է Մատթեոս Ուռհայեցին, նրա գանգից գավաթ է պատրաստել տալիս և դրանով զինի խմում, իսկ գանգի մնացած մասը ուղարկում է Մուֆարդիևի ամիրային⁷: Սակայն Փիլարտոսի ջանքերը ի դերև ելան, քանի որ Թոռ-

¹ Միքայել Չամչյանց, Եզվ. աշխ., էջ 997:

² Մատթեոս Ուռհայեցի, Եզվ., աշխ., էջ 207:

³ Այս մասին մանրամասն տե՛ս Է. Դանիելյան, Տարոնի և Սասունի Մամիկոնյան-Թոռնիկյանները, «Պատմա-բանասրիական հանդես», Երևան, 1979 №2, էջ 137-153:

⁴ Տե՛ս Մատթեոս Ուռհայեցի, Եզվ. աշխ., էջ 206:

⁵ Տե՛ս Մատթեոս Ուռհայեցի, Եզվ. աշխ., էջ 207:

⁶ Տե՛ս Ս. Բռնազյան, Եզվ. աշխ., էջ 183:

⁷ Տե՛ս Մատթեոս Ուռհայեցի, Եզվ. աշխ., էջ 206-209:

նիկ Մամիկոնյանի որդի Չորտվանելին հաջողվեց հաստատվել հոր պառոնին: Փաստորեն Սասունին տիրելու նրա ծրագիրը ձախողվեց¹:

Շարունակելով իր տարածքների ընդլայնման փորձը՝ Փիլարտոս Վարաժնունիին հաջողություններ ունեցավ Կիլիկիայում և հյուսիսաստրիքյան տարածքներում: 1076 թ. Անտիոքի դուքս Գրիգոր Մագիստրոսի որդի Վասակ Պահլավունու դավադրական սպանությունից հետո հայ զինվորների հրավերը ընդունելով՝ Փիլարտոսը գնում է Անտիոք: Ըստ եուրյան Անտիոքում գտնվող հայ զինվորները ճանաչում էին Փիլարտոսի գերիշխանությունն ու ձգտում էին հզոր պաշտպան ունենալ: Այստեղ Վասակ Պահլավունու վրեժը լուծելով՝ նա սպանում է 700 հույն զինվորների և հաստատում է իր իշխանությունը²:

Փիլարտոսը շարունակում էր հաղթական ռազմարշավը: Նրա հրամանով 1078 թ. Վասիլը գրավում է Եդեսիան, որը մինչ այդ կառավարում էր Լևոն դուքսը: Վասիլի մահից հետո Եդեսիան կառավարող Սմբատի դեմ ապստամբություն բարձրացնելով՝ մեծամեծներից Իշխան անունով մեկը հրավիրում է Փիլարտոսին և քաղաքը հանձնում նրան 1083 թ., սակայն վերջինս նոր ապստամբություններից խուսափելու համար ձերբակալում է Սմբատին, իսկ Իշխանին կուրացնելով՝ բանտարկում է Մարաշի բերդում: Իշխանին՝ իր դաշնակցին, կուրացնելու և բանտարկելու պատճառը, ըստ երևույթին, նրա կողմից հետագա դավադրություններից խուսափելն էր³:

Փիլարտոսի տիրապետությունը տարածվում էր նաև Կիլիկիայի մի զգալի մասի վրա: Կիլիկիայի մեծ մասին Փիլարտոսի տիրելու փաստը հաստատվում է Միխայել Ասորու տեղեկություններով: Նրա վկայությամբ հիսուն հայեր գալիս են Մարաշ և հպատակվում Փիլարտոսին, վերջինիս առաջնորդությամբ մտնում նաև Կիլիկիա և սելջուկներից գրավում Զեսունը, Մարաշը, հետագայում՝ Մալաթիան, Ուռհան: Պատմիչը տեղեկացնում է. «...եւ տիրեալ էր թուրքն երկրին եւ առին ի նոցանէ բերդ մի եւ ամրացան ի նմա, եւ անտի առին շուրջանակի Կիլիկիոյ աշխարհս բազումս, զՄարաշ, զԶեսուն, զԱպլաթան եւ զՄլտենի եւ զՈւռհա՝ յանկոյս Եփրատայ, եւ զայլս բազումս»⁴: Կիլիկիայի հյուսիսային և հյուսիս-արևմտյան շրջանում ու դաշտային Կիլիկիայում իշխում էին Տարսուսի Ապլարիպ Արծրունիի և Լամբրոնի Օշին իշխանը⁵, որոնք ենթարկվեցին Փիլարտոսին: Այն, որ Փիլարտոսը այս շրջանում ձևականորեն պահպանում էր հպատակությունը Բյուզանդիային, փաստում է «Սեբաստոս» բարձրագույն կոչմանն արժանանալը. «Իսկ լուեալ Յունաց թագաւորն առաքեաց նմա և անուանեաց զնա Սեվաստոս»⁶:

Այսպիսով, Փիլարտոսի հիմնած իշխանապետության սահմանները արևելքից արևմուտք ձգվում էին Եդեսիայից մինչև Կիլիկիայի արևմտյան մասը, հյուսիսից հարավ՝ Մալաթիայից մինչև Անտիոք⁷:

Փիլարտոսի իշխանապետության հիմնադրմանը և ամրապնդմանը նպաստեցին հետևյալ գործոնները.

¹ Տե՛ս Ղ. Ալիշան, Հայապատում, Վենետիկ, 1901, էջ 300:

² Տե՛ս Մատթեոս Ուռհայեցի, Լշվ. աշխ., էջ 213-214; Սմբատ Սպարապետ, Լշվ. աշխ., էջ 83-84:

³ Տե՛ս Մատթեոս Ուռհայեցի, Լշվ. աշխ., էջ 223:

⁴ Ժամանակագրություն տեառն Միխայելի Ասորոյ պատրիարքի, Յերուսաղեմ, 1871, էջ 399:

⁵ Նույն տեղում, էջ 86:

⁶ Նույն տեղում, էջ 399:

⁷ Տե՛ս Լ. Տեր-Պետրոսյան, Խաչակիրները և հայերը, Կ.Ա. Երևան, 2005, էջ 419:

ա) Սելջուկյան արշավանքների պատճառով հայ բնակչության զանգվածային արտագաղթը դեպի Կիլիկիա և Հյուսիսային Միջագետք¹:

բ) Սելջուկների՝ Փոքր Ասիա ներխուժելուց հետո Բյուզանդիան այլևս լուրջ քաղաքական ուժ չէր Արևելքում, և Փիլարտոսը կարող էր կայսրությունից անկախ իշխանություն հիմնել:

Բյուզանդիայի թուլացման պայմաններում հնարավոր դարձավ հիմնել մի ընդարձակ իշխանապետություն, որի ներուժը բավական էր սելջուկներին դիմակայելու համար:

3. Փիլարտոսը և հայկական կաթողիկոսությունը

Իր հզորությունը ի ցույց դնելու համար Փիլարտոսը որոշեց հայոց կաթողիկոսի նստավայրը տեղափոխել իր իշխանապետության տարածքը: Այդ ժամանակ Նրա իշխանապետության տարածքում էր ասորիների պատրիարքարանը (Եդեսիա), և Նա Գրիգոր Վկայասեր կաթողիկոսից պահանջեց, որ Նա թողնի իր նստավայր Մուտառատուն ավանը Ճամդավի շրջանում և տեղափոխվի իր մոտ: Գրիգոր Վկայասերը մերժեց և անախորժություններից խուսափելու նպատակով իր փոխարեն այնտեղ կաթողիկոս Նշանակեց Պետրոս Ա Գետադարձի եղբորորդի, Սեբաստիայի Սուրբ Նշան վանքի եպիսկոպոս Սարգիսին², որին կաթողիկոս ձեռնադրեցին Ջահան գավառի Հոնի ավանում³: 1076 թ. կաթողիկոսությունը հաստատվեց Փիլարտոսի իշխանապետության մեջ՝ Նրա ցանկության ու ծրագրի համաձայն: Սակայն 1077 թ. վախճանվում է Նորանշանակ կաթողիկոսը: Փիլարտոսի ջանքերով կաթողիկոս է օծվում Թեոդորոս Ալախոսիկը⁴, որին ևս վիճակված չէր երկար կառավարել: 1084 թ., երբ սելջուկյան արշավանքի հետևանքով Պոլտաշի ամիրան գրավում է Ջահան գավառը, կաթողիկոսանիստը Փիլարտոսի սահմաններից դուրս է մնում, իսկ Թեոդորոս կաթողիկոսը մերժում է Փիլարտոսի մոտ գնալու հրավերը: Այս հանգամանքով պայմանավորված՝ Փիլարտոսը որոշում է կազմակերպել Նոր կաթողիկոսի ընտրություն և այս անգամ առաջարկում է Հովհաննես արքեպիսկոպոսին՝ Մարաշի Սուրբ Աստվածածին թեմի առաջնորդին, որը մերժում է Փիլարտոսի առաջարկը⁵: Փիլարտոսը Նույն այս առաջարկով դիմում է Վարագա Սուրբ Նշանի վանահայր Պողոսին, որն էլ ընդունում է առաջարկը (1085 թ.): Նա կաթողիկոս է դառնում. «Հրամանաւ և կամօք Փիլարտոսի, և ոչ Աստուծոյ»⁶: Պողոս կաթողիկոսը ևս երկար չկառավարեց և 1093 թ. մահացավ ու թաղվեց Եդեսիա քաղաքում⁷:

11-րդ դարի վերջին բառորդին հայրապետական աթոռը տարբեր տեղերում էր կենտրոնացված: Մատթեոս Ուռհայեցու բնորոշմամբ՝ Ս. Գրիգորի աթոռը մի քանի մասի էր բաժանվել⁸. մասնավորապես տեր Բարսեղը հովվապետ էր Անի քաղաքում, տեր Վահրամ Պահլավունին՝ Եգիպտոսում, տեր Թեոդորոսը՝ Հոնիում և տեր Պողոսը՝

¹ Տե՛ս Մատթեոս Ուռհայեցի, Նշվ. աշխ., էջ 217-218:

² Նույն տեղում, էջ 252:

³ Նույն տեղում, էջ 252-253:

⁴ Տե՛ս Ն.Ադոնց, Երևելի հայեր, Երևան, 2015, էջ 476: Տե՛ս Մատթեոս Ուռհայեցի, Նշվ. աշխ., էջ240:

⁵ Կոմնագենացի, Նշվ. աշխ., էջ 37:

⁶ Մատթեոս Ուռհայեցի, Նշվ.աշխ., էջ 229:

⁷ Նույն տեղում, էջ 244:

⁸ Նույն տեղում, էջ 229:

Մարաշ քաղաքում¹: Այսպիսով, Փիլարտոսին չհաջողվեց իր տարածքում երկար պահել կաթողիկոսական աթոռը:

4. Փիլարտոսի իշխանապետության կործանումը

Փիլարտոսի ստեղծած ընդարձակ իշխանապետությունը միանշանակ ընդունվել էր կարող Բյուզանդիայի կողմից, քանի որ կայսրությունը շարունակում էր այն դիտարկել իբրև վասալական կախման մեջ գտնվող իշխանություն: Փիլարտոսի իշխանապետության թուլացման պատճառ հանդիսացան 1080-ականներին սելջուկյան նոր սուլթանություն հիմնելու հավակնորդ Սուլեյման իբն Զուլթուլմիշի արշավանքները: Սուլեյմանը գրավում է Նիկեան և Մարմարա ծովի կողմից շարժվում Կոստանդնուպոլսի ուղղությամբ: Սակայն նրան չի հաջողվում գրավել քաղաքը և նա ուղղվում դեպի Անտիոք: Քանի որ Փիլարտոսը գտնվում էր Եդեսիայում, 1084 թ. առանց լուրջ դիմադրության հանդիպելու սելջուկները գրավում են քաղաքը՝ այսպիսով ծանր հարված հասցնելով Փիլարտոսին: Այս մասին Մատթեոս Ուռհայեցին գրում է. «Գտեալ զքաղաքն (իմա՝ Անտիոք-Ա.Ս.) անպատրաստ և ի Յալպայ դիհեն ի գիշերի գողացան զքաղաքն Անտիոք եւ Փիլառտոսն էր ի քաղաքն Ուռհա...և օր քան զօր բազմանայր զօրք թուրքացն, և էառ զքաղաքն.եւ լուեալ զայս ամենայն Փիլառտոսն՝ ոչինչ կարաց առնել զուր ի հոգւոց հանեալ եւ դառնապէս ապաշաւէր»²: Սուլեյմանի մահից հետո՝ 1086 թ., Փիլարտոսը իր տարածքները պահելու համար նվերներով մեկնեում է Մելիթաի սուլթանի մոտ (1072-1092). «Եւ առեալ Փիլառտոսն բազում գանձս ոսկւոյ և արծաթոյ, և այնիւ ձիս և ջորիս, և հանդերձս երևելիս և պայծառս, և գնացեալ առ սուլթանն ի յաշխարհն Պարսից (իմա՝սելջուկների-Ա Ս)³»: Փիլարտոսը իր իշխանությունը պահպանելու համար նույնիսկ մահմեդականությունը ընդունեց: Բայց, այնուամենայնիվ, վերջինս անբարյացակամ վերաբերվեց Փիլարտոսին և մերժեց նրա՝ իր հովանու ներքո իշխանությունը պահպանելու առաջարկը: Փիլարտոսը Եդեսիայում (Ուռհա) իրեն փոխարինող էր նշանակել Պարակիմանոս սենեկապետին⁴, որը դավադրաբար սպանվում է Փիլարտոսի որդու՝ Բարսամի (Վարսամ) ձեռքով⁵. ըստ երևույթին, Բարսամը չհանդուրժեց իր փոխարեն մեկ ուրիշին փոխարինող նշանակելը: Իսկ սելջուկ զորավար Պուզանը Մելիթաի հրամանով գրավում է Ուռհան (1087 թ.) և քաղաքի կառավարիչ է նշանակում Խուլուխ անունով մեկին⁶:

Մելիթաի գերիշխանության ներքո անցելու միջոցով իր իշխանապետությունը պահպանելու փորձի ձախողումից հետո Փիլարտոսը վերադառնում է իր երկիր և ականատես լինում սելջուկների կողմից երկրի մեծ մասի գրավմանը: Ինչպես գրում է

¹ Նույն տեղում, էջ 229:

² Նույն տեղում, էջ 224-225:

³ Նույն տեղում, էջ 233:

⁴ Պարակիմանոսը անուն չէ, այլ կայսրությունում բարձրաստիճան պաշտոնյաներից մեկը (Parakimomenos՝ սենեկապետ): Տե՛ս Մատթեոս Ուռհայեցի, աշխր.թարգմ. Զ. Բարթիկյանի, Երևան 1973, էջ 333, ծկթ. 135:

⁵ Տե՛ս Կոմնագենացի, նշվ. աշխ., էջ 79: Այսպիսի տեղեկության չենք հանդիպում Մատթեոս Ուռհայեցու մոտ:

⁶ Տե՛ս Վարդանյ Քարճրբերդեցոյ Պատմութիւն տիեզերական, Մոսկվա, 1862, էջ 107:

Միխայել Ասորին, Փիլարտոսը զոջալով՝ Նորից դավանում է քրիստոնեություն, մտնում վանք¹ և այնտեղ էլ մեռնում 1090 թ.²:

Փաստորեն, Փիլարտոսի ստեղծած իշխանապետությունը 1072-1090 թթ. անհետ չվերացավ. 11-դարի վերջին և 12-րդ դարի սկզբին նրա տարածքում շարունակում էին գոյություն ունենալ հայկական մանր իշխանություններ, որոնք մինչ այդ Փիլարտոսի իշխանապետության մաս էին կազմում և հետագայում կործանվեցին խաչակիրների ձեռքով: Դրանցից մեկն էր Եղեսիայի իշխանությունը, որը ղեկավարվում էր Փիլարտոսի կողմից նշանակված Թորոսը, սակայն 1098 թ. մարտի 8-ին խաչակիր զորական Պաղտիկը (իմա՝ Բալդուին, հետագայում Եղեսիայի կոմս- Ա.Ս.) սպանում է Թորոսին և զրավում քաղաքը³: 1101 թ. Թորոս իշխանի աներ Գաբրիելը, որ կառավարում էր Մալաթիա քաղաքը, հարկատու դարձավ սելջուկներին, և քաղաքը անցավ Դանիշման ամիրայի ձեռք⁴:

11-րդ դարի վերջին Փիլարտոսի հպատակ Գող Վասիլը Զյուսիսարևմտյան միջագետքում և Կիլիկիայի մի մասում հիմնադրեց իշխանություն՝ Զեսուն կենտրոնով⁵: Այս իշխանությունը ևս կործանվեց խաչակիրների արշավանքների պատճառով 1117 թ.⁶:

Փիլարտոսի իշխանապետության փլուզման հետևանքով ձևավորված իշխանություններից միայն Կիլիկյան հայկական իշխանությունը պահպանեց իր անկախությունը Բյուզանդիայի, սելջուկների և խաչակիրների դեմ պայքարում, վերածվեց թագավորության՝ ընդհանուր առմամբ գոյատևելով շուրջ երեք դար: Պատմագրության մեջ կա բանավեճ այն մասին, որ Ռուբենը իր իշխանությունը ստացել է Փիլարտոսից: Գ. Միքայելյանը գտնում է, որ Ռուբենը Փիլարտոսից չի ժառանգել Կիլիկիայի իր իշխանությունը⁷, բայց միջնադարյան աղբյուրները մեզ հակառակն են ապացուցում: Այս մասին Կիրակոս Գանձակեցին գրում է, որ Փիլարտոսը զրավեց Կիլիկիան, որտեղ էին և Ռուբինյանները՝ թագավորական տոհմից սերողները. «Ի սկսանել թագաւորութեանն թուրքաց՝արք յիտուն, հայ ազգաւ, նեղեալք ի Նոցունց, ելին յանապատ սպառազինեալք, և ելին ի Մարաշ, գտին այր մի քաջ, Փիլարտոս անուն, եղին զնա զխաւոր և, մտեալ ի Կիլիկիա, առին զբովանդակ աշխարհն յորս էին և Ռուբինեանք՝ սերեալք թագաւորագունք⁸»: Որպես ասվածի հավաստում հարկ է մեջբերել նաև Մխիթար Այրիվանեցու հիշատակած փաստը, ըստ որի «իշխանք Կիլիկեցւոյ»⁹ ցանկի մեջ առաջինը գրված է Փիլարտոսի անունը, և ապա՝ Ռուբենի ու Կոստանդնի:

Փիլարտոսի իշխանության սահմաններում Կիլիկիայի մի զգալի մասի միավորումը հզոր ազդակ հանդիսացավ Կիլիկիայի իշխանության ստեղծման համար:

¹ Տե՛ս Միխայել Ասորի, նշվ. աշխ., էջ 399:

² Տե՛ս Ս.Բռնակյան, նշվ. աշխ., էջ 197; Ե. Յ. Զատունի, նշվ.աշխ., էջ 31:

³ Տե՛ս Գ. Միքայելյան, նշվ. աշխ., էջ 76:

⁴ Տե՛ս Մատթեոս Ուռնայեցի, նշվ. աշխ., էջ 272-274:

⁵ Տե՛ս Գ. Միքայելյան, նշվ. աշխ., էջ 78:

⁶ Տե՛ս Լ. Տեր-Պետրոսյան, նշվ. աշխ., էջ 421:

⁷ Նույն տեղում, էջ 90:

⁸ Կիրակոս Գանձակեցի, Պատմություն Հայոց, Երևան, 1961, էջ 83-84: Նույնը կարդում ենք նաև Միխայել Ասորու մոտ, Տե՛ս Միխայել Ասորի, նշվ. աշխ., էջ 406:

⁹ Տե՛ս Մխիթար Այրիվանեցու պատմություն ժամանակագրական, Ս. Պետերբուրգ, 1867, էջ 19:

Арарат Степанян, Княжество Филартоса Варажнуни (1072-1090), - Резюмируя: отметим, что Филартос Варажнуни сформировал свое княжество в условиях ослабления Византии и смог объединить большую часть Киликии, Эдессию, территории от Малатии до Антиоха. Здесь многочисленная и сплоченная армянская популяция дала ему возможность в течении двух десятилетий, создания огромной армии, и содержания границ монархии. Несмотря на то, что Королевство скоро перестало существовать, однако оно послужило мощной основой для возникновения других армянских более жизнеспособных княжеств.

Ararat Stepanyan, The Monarchy of Filartos Varazhnuni (1072-1090), - To summarize: we note that Filartos Varazhnuni formulated the monarchy in conditions of weakening of Byzantium and was able to unite most of Cilicia, Aedeses, the area from Malatya to Antioch. Here, a large and close-knit Armenian population within two decades gave him the opportunity of creating a huge army, and keeping the monarchy's borders. Despite the fact that the Kingdom soon ceased to exist, it has served as a strong foundation for the appearance of other more viable Armenian monarchies.

Արարատ Ստեփանյան- ԵՊՀ պատմության ֆակուլտետի սիյուռբագիտության ամբիոնի հայցորդ:

